



**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA TEŠANJ
OPĆINSKI NAČELNIK**

Broj:02-08-9-UP-01-4/15.
Datum: 03.06.2015.godine.

OPĆINSKO VIJEĆE TEŠANJ

PREDMET : Informacija o realizaciji zaključka Općinskog vijeća o oslobađanju od plaćanja kamata u postupcima izvršenja, dostavlja se.-

A) Općinsko vijeće Tešanj je na svojoj 26. sjednici održanoj 29.01.2015. godine razmatrajući Izvještaj o radu Općinskog pravobranilaštva za 2014. godinu i uočenim teškoćama u naplati starih potraživanja donijelo Zaključak kojim se oslobađaju obaveze kamata svi dužnici protiv kojih su pokrenuti sudski postupci izvršenja ako izvrše svoje uplate do 31.05.2015. godine. Pokrenuti sudski postupci su bili precizirani na dužnike po renti za građevinsko zemljište, naknadi za vatrogastvo i naknadi za taxi stajališta. Ovom Informacijom želimo Općinskom vijeću pružiti činjenice o efektima primjene pomenutog zaključka

S obzirom na navedeni Zaključak, u periodu februar-maj 2015. godine izvršena je uplata po obavezi za rentu za korištenje gradskog građevinskog zemljišta, u ukupnom iznosu od **39.198,29 KM**.

Razmatrano po godinama za koju je Renta dugovana taj pregled bi izgledao:

Period	Izmireno u navedenom periodu
2007-2010	1.305,04 KM
2011	3.554,65 KM
2012	3.067,73 KM
2013	10.599,57 KM
2014	18.250,30 KM
2015	2.421,00 KM

Ukupan broj riješenih predmeta u tom periodu iznosi **400** dok je u radu ostalo još **1021** predmet. Može se konstatovati da je u odnosu na isti period 2014. godine, kada je naplata iznosila 30.143,79 KM, došlo do povećanja ukupne naplate za **30,04%**. Osim direktnog efekta u naplati potraživanja, koja bi možda bila i upitna, manji je utrošak vremena i troškova rada Pravobranilaštva i Suda. To vrijeme i energija mogu se iskoristiti u drugim aktivnostima.

Navedene brojke su rezultat medijske kampanje koja je propratila doneseni zaključak, kao i niz telefonskih i usmenih kontakata sa strankama dužnicima.

S obzirom na činjenicu da veliki broj obveznika /dužnika za rentu za gradsko građevinsko zemljište ne živi na teritoriju naše općine (žive u inostranstvu), a koji dolaze za vrijeme ljetnih odmora, moguće je da bi važenje usvojenog Zaključka vijeća zaključno sa 30.09.2015. godine moglo povećati ukupne efekte , kada se očekuje i veća naplativost potraživanja po dugovanjima.

B) U periodu implementacije Zaključka pristigao je i zahtjev Napredak d.d. Tešanj, koji ima neizmirene obaveze prema općini Tešanj za korištenje pozajmice u periodu 1998-1999 godina. U tom periodu općina je putem pozajmica poslovnim subjektima (dok su bili u državnom vlasništvu) nastojala podstaknuti brži privredni rast i razvoj. Iznos potraživanja za glavni dug je 134.838,22 KM, te uz to za kamatne obaveze od 264.511,47 KM. Iznos glavnog duga je utvrđen sudskom presudom.

Zahtjevom Napretka doo ponuđene su dvije varijante izmirenja dugova:

- a) Da se odgovarajućim sporazumom omogući izmirenje duga na teret kapitala društva. To bi u stvari značilo da općina postaje dioničar preduzeća. Ovakvo rješenje je primijenjeno kod dugovanja prema Fondu zdravstvenog osiguranja, Odlukom Vlade Federacije BiH.
- b) Da se Napredak doo kreditno zaduži i jednokratno uplati 80% glavnog duga, a da općina oprost 20% glavnog duga i iznos zatezних kamata.

Kako se radi o firmi koja upošljava 291 radnika, koja je u ekspanziji kroz nove ugovore sa kupcima, koji će obezbijediti upošljavanje dodatnih 50 radnika, a koja je s druge strane opterećena obavezama iz ranijih perioda poslovanja (dugoročne obaveze za PIO i drugo u visini od 1.838.191 KM) i akumuliranim gubitkom iz 2008. godine od 1.116.698 KM, nadležne službe su sagledale mogućnost udovoljenja ovom zahtjevu.

U prvoj varijanti općina bi ušla u vlasničku i upravljačku strukturu Napretka doo, što bi bilo na granici djelatnosti lokalne samouprave i izvan primarne funkcije lokalne samouprave-općine.

U drugoj varijanti Općina bi prihvatanjem zahtjeva, u određenom obliku!, obezbijedila uplatu potraživanog iznosa i uključenje istog već u prihode Budžeta za 2015. godinu, te s druge strane funkcionisanje firme sa provođenjem dodatnog zapošljavanja.

Nasuprot ponuđenim varijantama izmirenja dugova, ostaje mogućnost da općina nastavi sa potraživanjem osnovog duga + zatezne kamate, te pri tome koristi različite mehanizme, od različitih sporazuma do eventualne blokade računa radi naplate cjelokupnog potraživanja sa kamatama. U tom slučaju može se dovesti u pitanje dalje funkcionisanje firme i obezbjeđenje postojećih i novih radnih mjesta. U tom slučaju upitna je i naplata cjelokupnog potraživanja.

Nadležnost za oslobađanje od obaveze plaćanja zatezних kamata po osnovu potraživanja općinskog Budžeta je isključivo na organima lokalne samouprave (čl.8. Zakon o principima lokalne samouprave u Federaciji BiH "Službene novine Federacije BiH broj 49/06", gdje kaže da u vlastite nadležnosti jedinice lokalne samouprave spada između ostalog i "donošenje programa i planova razvoja jedinice lokalne samouprave i stvaranje uvjeta za privredni razvoj" kao i "donošenje propisa o porezima, naknadama, doprinosima i taksama iz nadležnosti jedinice lokalne samouprave")

Za federalni nivo Parlament Federacije je u 2013. godini usvojio dopune Zakona o visini stope zatezne kamate na javne prihode ("Službene novine Federacije BiH", broj 41/13/29.5.2013.), kojom je izvršeno oslobađanje od plaćanja zatezne kamate za obveznike koji svoje obaveze izmire u definisanom roku. Ovo oslobađanje se odnosi na javne prihode po federalnim propisima.

Shodno gore navedenom, Općinsko vijeće treba da se odredi po podnesenom zahtjevu, uvažavajući iznesene okolnosti.

OPĆINSKI NAČELNIK
mr. sc. Suad Huskić, profesor

